



白氏文集

六十六 六十七

~ 16  
4040  
32





大矢根文次郎  
216  
4040  
32

櫻山文庫



鳥羽氏  
藏書記

教育書購入費受入図書  
昭42 1708

早稲田大学  
教育学部図書

<2005-44>

白氏長慶集卷第六十六  
唐太子少傅刑部尚書致仕贈尚書右僕射太原  
白居易樂天者

明後學松江馬元調巽甫校

判 凡五十  
一道

得甲去妻後妻犯罪請用子蔭贖罪甲怒不許  
二姓好合義有時絕三年生育恩不可遺鳳雖阻於和  
鳴鳥豈忘於返哺旋觀怨偶遽抵明刑王吉去妻斷絃  
未續孔氏出母疎網將加誠鞠育之可思何患難之不  
救况不安爾室盡孝猶慰母心薄送我畿贖罪寧辭子

白集

卷六十六

一



陰縱下山之有怒曷陟此之無情想芣苢之歌且聞樂  
有其子念葛藟之義豈不忍庇于根難抑其辭請敦不  
置

得辛氏夫遇盜而死遂求殺盜者而為之妻或

責其失貞行之節不伏

親以恩成有讎寧捨嫁則義絕雖報奚為辛氏姑務雪  
冤靡思違禮勵釋憾之志將殄荏苒朱惟蒲蓄許嫁之心  
則乖松竹况居喪未卒改適無文苟失節於未亡雖復  
仇而何有夫讎不報未足為非婦道有虧誠宜自耻詩  
著靡他之誓百代可知禮垂不嫁之文一言以蔽無效

尤於邾婦庶繼美於恭姜

得乙與丁俱應拔萃乙則趨時以求名丁則勤

學以待命互有相非未知孰是

立已徇名則由進取修身俟命寧在躁求智乎雖不失  
時仁者豈宜棄本屬科懸拔萃才選出羣勤苦脩辭乙  
不能也吹噓附勢丁亦耻之躁靜既殊性習遂遠各從  
所好爾由徑而方行難強不能吾捨道而奚適觀得失  
之路或以由人推通塞之門誠應在命所宜勵志焉用  
趨時若棄以菲葑失則自求諸已儻中其正鵠得亦不  
愧於人無尚苟求盡嘉自致



得丁冒名事發法司准法科罪節度使奏丁在  
官有美政請免罪授真以勸能者法司以亂  
法不許

有則利淫誅則傷善失入猶可壞法實難丁僭濫為心  
僥倖從事始假名而作偽各則自貽終勵節而為官政  
將何取節使以功惟補過請欲勸能憲司以仁不惠姦  
議難亂紀制宜經久理貴從長見小善而必求材雖苟  
得踰太防而不禁弊將若何濟時不在於一夫守法宜  
遵乎三尺盍懲行詐勿許拜真

得乙上封請求不用赦大理云廢赦何以使人

自新乙云數赦則姦生恐弊轉甚

刑乃天威赦惟王澤于以御下存乎建中上封以宥過  
利淫倖門宜閉大理以盪邪除舊權道當行皆推濟國  
之誠未達隨時之義何則政包寬猛法有弛張習以生  
常則起為姦之弊廢而不用何成作解之恩請思砭石  
之言兼詠藜蕭之什數則不可無之亦難

得景居喪年老毀瘠或非其過禮景云哀情所

鍾

孝乃行先則當銜恤子為親後安可危身景喪則未終  
老其將至懷荼蓼之慕誠合盡哀迨桑榆之光豈宜致



毀所以爰資肉食唯服麻練况血氣之既衰老夫耄矣  
縱哀情之罔極吾子忍之苟滅性而不勝則傷生而非  
孝因殺立節庶畢三年之喪順變從宜無及一朝之患  
既虧念始當愧或非

得辛奉使遇昆弟之仇不鬪而過為友人責辭

云銜君命

居兄之仇避為不悌銜君之命鬪則非忠將滅私而奉  
公宜棄小而取大辛時惟奉使出乃遇讎斷手之痛不  
忘誠難共國飲水之命未復安可害公節以忠全情由  
禮抑未失使臣之體何速諍友之規史駢立言嘗聞之

矣子夏有問而忘諸乎是謂盡忠于何致責

聞軍帥選將多用文儒士兵部詰其無武藝帥

云取其謀也

忘身死節誠重武夫制敵伐謀則先儒士將籌策而可  
尚奚騎射之足稱軍帥明以知兵精於選將以為  
學劔用無出於一夫悅禮敦詩道可弘於七德功宜保  
大理貴從長若王師之有征以謀則可苟戎略之無取  
雖藝何為况晉謀中軍選於義府漢求上將舉在儒流  
豈惟我武惟揚誠亦斯文不墜元戎舉德未爽能軍兵  
部執言恐為辱國



得甲至華嶽廟不禱而過或非其違眾甲云禱非禮也

嶽則配天自修常事神雖福善安可苟求宜率道以去邪豈從眾而失正甲志惟守義言乃合經以為視以三公實天子之所饗降其百福寧匹夫之可禳如修蘋藻之誠是用秕稗之禮况人之僭濫徒欲乞靈而神實聰明豈歆淫祀非鬼是為諂也黷神無乃吐之旅於泰山古猶致誦禱于華嶽今豈不非諒正直之難誣雖馨而勿用將勸來者所宜救歟

得乙隱居徵辟不起子孫請以所辟官用陰所

司不許

修身獨善寵則可驚制爵尊賢命其難廢形雖遺於軒冕蔭宜及於子孫乙貞以自居辟而不起鶴書莫顧雖忘卹後之心爵命已行寧闕賞延之典若使死無用蔭生不及榮何成旌善之風且是廢君之命塲苗不食誠自絕於繫維葛藟有陰義難虧於燕翼請優後嗣以獎外臣

得江南諸州送庸調四月至上都戶部科其違限詎云冬月運路水淺故不及春至

賦納過時必先問罪淹卹有故亦可徵辭月既及於正



陽事宜歸於宰旅展如澤國蓋納地征歲有不貢之程  
敢忘慎守川無負舟之力寧免稽遲苟利涉之惟難雖  
愆期而必宥地官致詰虛月其憂江郡執言後時可愍  
然恐事非靡監辭或憑虛請驗所屈公文而後可遵令  
典

得景為縣令教人煮木為酪州司責其煩擾辭

云以備凶年

事不舉中有災寧救政或擾下雖惠何為景念在濟時  
動非率法且煩入而不恤是昧烹鮮何款歲以為虞將  
勤煮酪信作勞於無用豈為教之有方必也志切救災

道敦行古周官荒政自可擇其善者新室弊法焉用尤  
而效之宜聽責言勿迷知過

得丁為郡守行縣見昆弟相訟者乃閉閣思過

或告其矯辭云欲使以田相讓也

化本自家政先為郡禮寧下庶宜寬不悌之刑訓在知  
非是得長入之道况天倫不睦地訟攸興利方競於膏  
腴恩難虧於骨肉教宜孔古過貴自新雖聞爭鬪許激  
嚮有傷魯衛之政庶使愧而讓畔將同虞芮儒稅之風  
苟無訟之可期則相容而何遠推田以讓爾誠謝於孟  
光閉閣而思吾何慙於延壽宜嘉靜理勿謂矯誣



得甲獻弓躡甲而射不穿一扎有司詰之辭云  
液角者不得牛戴牛角

貫革垂方則宜致詰相角失理亦可徵辭甲奠體以成  
執簫而獻中規不撓六材雖則合三捨拔有愆七扎不  
能穿一宜恐傷人之甲不曰堅乎而非戴牛之弓無自  
入也液信虧於巧者射遂爽於臧今周典足徵彼自乖  
於三色楚君明試此無愧於二臣咎且有歸責之非常  
得乙有同門生喪親將往弔之其父怒而撻之

使遺縑而已或詰其故云交道之難

予道貴恭當從理命交游重義蓋卹哀情孝不在於詭

隨仁豈忘於惻隱乙父訓垂愛子道昧擇交况求益之  
初無友不如已者及居喪之際凡人猶合救之既罔念  
於一哀是不遵於父要苟知生而不弔雖贈死以何為  
舊館遇喪宣父尚宜出涕同門在戚王丹未可忘情縱  
申遺帛之誠豈補贈芻之義肆一杖之怒父兮既爽義  
方杜三諫之辭子也亦虧孝道宜哉或詰允矣知言

得轉運使以汴河水淺運水不通請築塞兩河  
斗門節度使以當軍營田悉在河次若斗門  
築塞無以供軍

川以利涉竭則雍稅水能潤下塞亦傷農莊捨短以從



長宜去彼而取此汴河決能降雨流可通財引漕運之  
千艘實資積水生稻梁於一溉亦藉餘波利既相妨用  
難兼濟節度使以軍儲務足思開寶而有年轉運司以  
邦賦貴通恐負舟而無力辭雖執競理可明徵壅四國  
之征其傷多矣專一方之利所獲幾何贍軍雖望於秋  
成濟國難虧於日用利害斯見與奪可知

得景為宰秋雩刺史責其非時辭云旱甚若不

雩恐為災

居常授時政則行古恤人救弊道在從宜旱將害於桑  
盛雩難拘於秋夏景象雷是職不雨其憂苟旱魃之愆

時虐既太甚雖蓐收之戒序雩亦何傷冀有聞於鶴鳴  
庶無慮於狼顧馨香以感夕且望於月離稼穡其傷時  
難遵於龍見雖事乖魯史而義合隨時製錦執言是亦  
為政褻帷致詰未可與權

得丁為郡歲凶奏請賑給百姓制未下散之本

使科其專命丁云恐人困

臨邦匡乏情本由衷為國救災美終歸上丁分條出守  
求瘼居心歲不順成人既憂於二醜與釜同公有滯積戶  
將餼於一鍾是輸濟眾之誠允叶分憂之政然以事雖  
上請恩未下流稍違主守之文遽見職司之舉使以未



有君命何其速歟郡以苟利國家專之可也卹貧振廩  
鄧攸雖見免官矯制發倉汲黯不聞獲罪請宥自專之  
過用旌共理之心

得戊兄爲辛所殺戊遇辛不殺之或責其不弟

辭云辛以義殺兄不敢返殺

捨則崇雠報爲傷義當斷友于之愛以遵王者之章戊  
居兄之仇應執兵而不返辛殺人以義將俾資四刃而  
攸難雖魯策垂文不可莫之報也而周官執禁安得苟  
而行之將令怨是用希實在犯而不校揆子產之誠損  
怨爲忠徵史駢之言益仇非智難從不弟之責請聽有

李之辭

得甲爲將以簞醪投河命衆飲之或非其矯節

甲云推誠而已何必在醉

將主軍情酒存人欲推誠之義必在於均飽德之文不  
專於醉甲寄分外閫令出中權九醞投河義山獨斷一  
瓢飲水惠在同霑儻師人之多寒恩逾挾續如戰上之  
載渴功倍望梅分少以表無頗和衆寧宜及亂豈資滿  
腹所貴歸心少卿絕甘見稱漢代子反獨醉實敗楚軍  
苟臧否之必由何古今之有異非其矯節是不知言  
得乙有罪丁救以免乙不謝或責之乙云不爲



已

在公而行誠非為已懷惠以謝則涉徇私彼既求仁而得仁此宜以直而報直乙惟獲戾丁乃解紛以為非罪而拘冷長見稱於尼父直言以免叔向寧謝於祁奚論恩則丘山不勝在道而江湖可忘况情非私謁可以不愧于人義在公行實以無求於我合嘉遺直勿聽責言得景妻有喪景於妻側奏樂妻責之不伏

喪則有哀見必存敬樂惟飾喜舉合從宜夫婦所貴同心吉凶固宜異道景室方在疚庭不徹懸鏗鏘無倦於鼓鍾好合有傷於琴瑟既愆夫義是棄人喪儼麻縗之

在躬是吾憂也調絲竹以盈耳於汝安乎如賓之敬頗乖若往之哀斯瀆遂使唱和不應憂喜相于道路見綴猶聞必變隣里有殯亦為不歌誠無惻隱之心宜受庸奴之責

得甲年七十餘有一子子請不從政所由云人

戶減耗徭役繁多不可執禮而廢事

役且有辭信非懋力老而不養豈謂愛親戀若阻於循陔怨必興於陟岵顧惟甲子及此丁年戶減事繁政宜勤於晝夜家貧親老養難闕於晨昏在子道而可矜雖王徭之宜免事聞諸禮情見乎辭天子敦風猶勸養其



三老庶人從政亦何假於一夫况當孝理之朝難抑親人之請所由之執愚謂不然

得景於逆旅食噬腊遇毒而死其黨訟之主人

云買之有處

生不可保死必有因蓋知命於喪子豈尤人於食我景秋蓬方轉朝薤何戒欲晞旅次爰來將受餐而已生涯濫盡當終食之間且非祭地之疑自是逢天之戚永言其黨不察所由死且焉知徒云噬腊之毒買而有處請無寘董之嫌誠虐士之可哀在主人而何咎幸思知物無妄罪人

得詔賜百寮資物甲獨以物委地而不拜有司

劾其不敬云本賊物故不敢拜

賜表主恩拜明臣禮苟臨事而不敬雖有辭而勿聽甲列在朝行頒其資物宜荷天而受賜何委地而如遺會是姦賊誠可惡於清德今為寵錫諒難拒於鴻私既為善而近名亦失恭而遠禮必也志疾貪冒節勵貞廉自當辭讓有儀豈得棄捐不拜况人不易物鍾離委珠而徒為心苟無瑕伯夷飲泉而何爽宜許有司之劾用懲不恪之辜

得乙為大夫請致仕有司詰其未七十乙稱羸



病不在事

時制未及尚可俟朝疾疹所加固難陳力乙位參食采志在懸車揆以紀年桑榆之光未暮驗其羸病蒲柳之質先零既稱量力而行所謂奉身以退雖髮味種種告老無乃速歟而心既諄諄致政固其宜矣請高知止無強不能

得景為縣官判事案成後自覺有失請舉牒追

改刺史不許欲科罪景云令式有文

政尚從寬過宜在宥苟昨非之自悟則夕改而可嘉景乃案察參諸簿領當推案務劇詎免毫釐之差屬寒惟

政苛不容筆削之改誤而不隱悔亦可追縣無罔上之姦州有刻下之虐先迷後覺判事雖不三思苟有必知牒舉明無二過揆人情而可恕徵國令而有文將欲痛繩恐非直筆

得甲替乙為將甲欲到乙嚴兵守備不出迎發

制書勘合符以法從事御史糾其無賓主之

禮科罪不伏

師律貴貞兵符示信苟未會合敢忘戒嚴乙奉中權甲承後命推輪相代言赴及瓜之期裏甲自防猶軫前茅之慮且信惟守器權在隱情符節既未合同軍衛如何



徹警所宜慮遠安可徇私闕於將迎雖乖主禮究其守備是叶軍謀無責建牙恐非直指

得鄉老不輸本戶租稅所司詰之辭云年八十餘歲有頒賜請預折輸納所司以無例不許丹制既登誠宜加惠歲賦不入何以奉公苟布常而是違雖移用而不可鄉老年叅耆耄名繫版圖天賜未頒且有躁求之請地征合納非無苟免之心曾是徇私固難違例况時逢恤老節合勤王尚齒肆筵我歲敦於善養食毛入賦爾奚忘於樂輸受賜任待於時頒量入難虧於歲杪不從妄請誠謂職司

得乙女將嫁於丁既納幣而乙悔丁訴之云未

立婚書

女也有行義不可廢父今無信訟所由生雖必告而是遵豈約言之可爽乙將求佳婿會不良圖入幣之儀既從五兩御輪之禮未及三周遂違在耳之言欲阻齊眉之請况卜鳳以求士且靡咎言何莫鴈而從人有乖宿諾婚書未立徒引以為離聘財已交亦悔而無及請從玉潤之誚無過桃夭之時

得景請與丁卜丁云死生付天不付君也遂不卜或非之



聖人建易雖用稽疑君子樂天固宜知命苟吉凶之問  
 稽何中否之足詢丁執心不同出言有中爾考前知之  
 兆誠足決疑吾從昆命之文必先蔽志以為禍福由已  
 休咎則繫於慎行生死付天脩短乃存乎陰陽當脫身  
 於木鴈寧問命於著龜言既中倫理亦窮性况詹尹釋  
 策有問焉知鬪廉立言不疑何卜不從握粟是謂忘筮

得耆老稱甲多智縣司舉以理人或云多智賊

也未知合用否

道雖棄智政且使能苟養之以恬則用之不惑甲稱予  
 智縣舉予知時老者之審才得賢斯美何或人之情理

為賊是虞誠蔽蕩之無聞庶利人之可取然以智殊小  
 大用有否臧識若限於挈瓶或當害物道能弘於樂水  
 何爽理人請審兩端方從一見

得乙為邊將虜至若涉無入之地監軍責其無

勇畧辭云內無糗糧外無犄角

封疆貴安伍候尚警苟不固吾圉則速即爾刑乙登以  
 將壇鎮于邊壘誠可戒嚴走集罔有敵于我師何乃啟  
 納寇戎若無人於吾地是昧安邊之畧信貽失律之凶  
 拳勇度聞罪戾誰執如或寇強師老食絕城孤期盡敵  
 而還且勤於堅守苟知難而退猶愈於覆亡宜矜犄角



白集 卷之六 十四  
之辭難議建牙之罪

得景進柩子過期壞損所由科之稱於浙江陽  
子江口各阻風五日

進獻失期罪難逃責稽留有說理可原情景乃行人奉  
茲錫貢薦及時之果誠宜無失其程阻連日之風安得  
不愆于素覽所由之詰聽使者之辭既異違寧難科淹  
恤限滄波於干役匪我愆期販朱實於厥苞非予有咎  
捨之可也誰曰不然

得丁喪所知於野張帷而哭鄰人詰云夫子惡  
野哭者

死喪有別哭泣從宜情或異於親疎禮則殊於內外丁  
義勤交道動循容止未忘半面嘗同傾蓋之歡永念重  
泉遂展張帷之哭雖聲非有慟而分止所知未乖夫子  
之言何致鄰人之詰如或肆號咷於路左物或惡之今  
則具威儀於野中禮無違者允符前志奚卹斯言

得甲妻於姑前叱狗甲怒而出之詎稱非七出  
甲云不敬

細行有虧信乖婦順小過不忍豈謂夫和甲孝務恪恭  
義輕好合饋豚明順未聞爽於聽從叱狗愆儀益勿庸  
於疾怨雖怡聲而是昧我則有尤若失口而不容人誰



無過雖敬君長之母宜還王吉之妻

得乙為軍帥夜進軍諸將不發欲罪之辭云不

見月章

表旗示信戎政貴明在九章而或乖雖三令而惟反乙是稱戎師未達軍容奉明罰之辭無聞月捷用潛師之計方事宵征徒欲董以爪牙曾不明其耳自况將經武必在昭文夜號未申有虞固宜不進月章莫舉毀贖自可當辜訴非失辭責乃當罪

得景嫁殤鄰人告違禁景不伏

生而異族死豈同歸且非合祔之儀爰抵嫁殤之禁景

天婚是恤窳斯非以處子之薨華遷他人之蒿里曾靡上於鳴鳳各異室家胡為相以青烏欲同宅兆從念幼年無偶豈宜長夜有行况生死寧殊男女貴別縱近傾倒之歲且未從人雖有遊岱之竟焉能事鬼既違國禁是亂人倫請徵媒氏之文無抑鄰人之告

得丁陳計請輕過移諸甲兵省司以敗法不許

丁云宥罪濟時行古之道何故不可

軍興事亟則務益兵時泰教成固難敗法丁志崇陳計識昧相時當兵戢之朝詎資凶器在刑行之日寧利幸人是廢國章欲崇軍實禍關黷武弊起惠姦宥罪未若



慎刑濟軍不如經國况王霸道異古今代變小或管氏之器會是行權苟矣省司之言孰非經父得失斯在用捨可知

得甲在獄病久請將妻入侍法曹不許訴稱三品以上散官

獄雖慎守病則哀矜苟或無瘳如何罔詔甲罪抵刑憲身從幽繫憂能成疾膏肓之上未痊危則思親縲紲之中有請勢窮搖尾念切齊眉臥或十旬既軫彌留之懼官惟三品宜從侍執之辭敢請法曹式遵令典  
得乙聞牛鳴曰是生三犧皆用之矣問之皆信

或謂之妖不伏

上稟天性旁通物情是謂生知孰云行怪况形雖異類心則同歸四鳥分飛聽音既稱有信三犧皆用聞鳴豈可為妖且叶前言殊非左道爾惟不講我則有辭揆以周官業將同於夷隸詳夫魯史責不及於葛盧獸語可徵人言奚恤

得丁母乙妻俱為命婦每朝參丁母云母尊婦

甲請在婦上乙妻云夫官高不合在下未知孰是

肅恭成德卑則敬尊著定辨儀賤無加貴眷彼母妻之



品視其夫子之官敬將展於君前禮且殊於門內閨闈  
垂訓長幼雖合有倫朝廷正名等列豈宜無別婦道雖  
云守順國章未可易班母則失言妻唯得禮且子今位  
下尚欲宗予而夫也官崇如何卑我請依序守無使名  
愆

得景請預駙馬所司糾云景庶子也且違格令

欲科家長罪不伏

冒婚傲倖既抵官刑罔上失忠亦虧臣節在幼賤而不  
禁豈尊長之無辜屬下嫁王姬愛求都尉選吹簫之匹  
雖則未獲真又預傳粉之郎豈可濫收庶子况姻連天

族榮冠人倫詞既異於承祧禮難當於釐降掩藏庶孽  
唯慮其不諧貪冒寵榮詎思於有罪豈非或益而損曾  
是欲蓋而彰國章寧捨於面欺家長宜從於首坐

得甲夜行所由執之辭云有公事欲早趨朝所

由以犯禁不聽

趨朝有時則當蚤作防姦以法寧縱晨行雖夙夜之自  
公豈警巡之可犯甲陳力是念相時斯昧左鳴三鼓知  
行夜之猶嚴未闢九門信將朝而尚早趨進合遵於辨  
色夙興宜同其啓明既爽時然後行必是動而有悔非  
巫馬為政焉用出以戴星同宣子俟朝胡不坐而假寐



宜遵街禁用表司存

得郡舉乙清高廉使以為通介無常罪舉不當  
郡稱往通今介時人無常乙有常也

退藏守道自合銷聲待用濟時則難背俗乙行藏未達  
通介不常若德至而無稱固當滅跡既名彰而見舉誠  
合隨時徒立身以清高且於物而凝滯無固無必蓋守  
宜尼之言獨清獨醒信貽漁父之誦兼濟豈資於絕俗  
全真未爽於同塵宜從不當之科俾慎無常之舉

得景於私家陳鐘磬鄰人告其僭云無故不徹

懸

器不假入易而生亂樂惟節事過則有刑禮既異於古  
今法且禁其鐘磬景荷求飾喜罔念速尤竊荀箴以陳  
樂由奢失僭金石而奏罪以聲聞雅當犯貴之辜難許  
徹懸之訴然恐賜同魏絳僭異于奚且彰北闕之恩何  
爽南鄰之擊是殊國禁無告家藏

得丁氏有邑號犯罪當贖請同封爵之例所司

不許辭云邑號不因夫子而致

邑號旌賢國章議貴如或不能自庇則將焉用其封丁  
氏恩降閨門罪權邦憲寵非他致既因表以勳賢咎雖  
自貽亦可免於刑戮若不從其實典則何貴於虛封漢



郵緹榮猶聞贖父齊分石窳豈不庇身宜聽輯矣之辭  
難奪贖今之請

得景與乙同買景多收其利人刺其貪辭云知

我貪也

仁無貪貨義有通財在繫身而雖乖於知已而則可景  
乙奇贏同業氣類相求競以錐刀始聞小人喻利推其  
貨賄終見君子用心情表深知事符往行如或貧富必  
類自當與讓立廉今則有無相懸固合損多益寡是為  
狗義豈曰竭忠受粟益親孔氏用敦吾道分財損已叔  
牙嘗謂我貧無畏人言俾彰交態

得景夜越關為吏所執辭云有追捕

設以關防辯其出入既慎守而無怠豈偽遊而能過景  
勤恪居懷夙夜奔命以謂寇攘事切宜早圖之罔思呵  
察戒嚴不可踰也朱惟切蒲乃司敗小事襟帶實國家  
太防仰老氏之文雖知善閉稽周公之制尚曰不征責  
已具於有司理難辭於靡盬盍從致詰無信飾非

得乙以庶男冒婚丁女事發離之丁理饋賀衣

物請以所下聘財折之不伏

婚以匹成嫡庶宜別訟由情察曲直可知將令人有所  
懲必在弊之不及隱其庶孽冒乃婚姻情以矯誣始聞



好合事斯彰露旋見化離既生非偶之嫌遂起納徵之  
訟詞多執競理有適歸乙則隱欺在法而聘財宜沒丁  
非罔冒原情而饋禮可追是非足明取與斯在

得乙在田妻餉不至路逢父告飢以餉饋之乙

怒遂出妻妻不伏

象彼坤儀妻惟守順根乎天性父則本恩饌宜進於先  
生簞可輟於田峻夫也望深饁彼方期相敬如賓父兮  
念切囂然旋聞受哺於子義雖乖於齊體孝則見於因  
心盍喜陟岵之仁翻肆送畿之怒孰親是念難忘父一  
之言不爽可徵無效士二其行犬馬猶能有養爾豈無

聞鳳凰欲阻于飛吾將不取

白氏長慶集卷第六十六終



白氏長慶集第六十七  
 唐太子太傅刑部尚書致仕贈尚書右僕射太原  
 白居易樂天著  
 明後學松江馬元調巽甫校

白氏長慶集第六十七

唐太子太傅刑部尚書致仕贈尚書右僕射太原

白居易樂天著

明後學松江馬元調巽甫校

判凡五十道

得丁上言豪富人畜奴婢過制請據品秩為限

約或責其越職論事不伏

品秩異倫臧獲有數苟踰等列是紊典常丁志在作程  
 惡夫過制爰陳誠於白秦俾知禁於素封將使豪富之  
 徒資雖積於鉅萬僮僕之限數無踰於指于抑淫義叶



於隋時革弊道符於漢日責其論事無乃失辭若守職以越思則為出位將盡忠於陳計難伏嘉言楚既失之鄭有辭矣

得甲為邠州刺史正月令人修耒耜廉使責其

失農候訴云土地寒

教有權節業無易宜地苟異於寒溫農則殊於早晚甲分憂率職從俗勉入天時有常農宜先定地氣不類寒則晚成雖愆採木之時未違把草之候正惟蕪使何味遺風縱稼器之已修先成焉用苟土膏之不起欲速何為誠宜嘉乃辨方豈可詰其行古循諸周禮脩耒雖在

於季冬訓此幽人于耜耒乖於正月責則迂也訴之宜哉

得乙掌宿息并樹客至不誅相翔者御史糾之

辭云罪在守塗之人

姦或不誅吏將焉用苟欲科其官失必先辨以司存乙慎守無聞庀徒有怠嘉賓戾止誠宜慮以相翔最客事來固合擒而勿佚既墮官禁是縱公行且戒事之前不取嚴於聚托慢官之後欲移過於守塗誠乖率屬之方宜甘責帥之罰然以官雖聯事等列或殊罪不同科重輕宜別比夫所屬請以異論



得景為私客擅入館驛欲科罪辭云雖入未供傳舍是崇使車攸處將供行李必辨公私何彼客遊欲從公食豈無逆旅宜受饋於盤飧既匪使臣何苟求於館穀信饗餐而是啟寧潛濫之可客同周官之廬入宜銜命非鄭氏之驛置豈延賓法既自于咎將誰任然則不應入而妄入刑固難逃而已供與未供罪宜有別請從減降度叶科條

得洛水暴漲決破中橋往來不通人訴其弊河南府云雨水猶漲未可脩橋縱苟施功水來還破請待水定人又有辭

大水為災中橋其壞車徒未濟誠有阻於往來脩造從宜亦相時之可吝顧茲浩浩阻彼憧憧人訴川梁不通壅而為弊府慮水沴薦至毀必重勞苟後患之不圖則前功之盡棄將思濟衆固合俟時徵啟塞之文雖必葺於一日防懷襄之害未可應乎七星無取人辭請依府見

得景為將敵人遺之藥景受而飲之或責失人

臣之節不伏

軍尚隱情臣宜守道况握中權之要當絕外交之嫌景受命建牙遇敵飲藥直雖可舉忠則不知且事君在公



訓旅貴信失人臣之節爾豈自明惑士卒之心吾將安  
 仰况兵惟尚詐人不易知同饋醪而無他推誠猶可苟  
 流毒而不察雖悔寧追無謀既昧三患不伏恐涉貳過  
 勿疑以飲徒徇陸抗之名未達而嘗且墜宣尼之訓是  
 違師律難償鄰言

得丁將在別屯士卒有犯每專殺戮御史舉劾

詐稱曾受祭戟之賜

將非處右莫敢示威軍或別屯則宜專命丁位雖佐理  
 分以戎行執專征之權錫弓於周典操司獄之柄受祭  
 於漢儀既有命而必行信無瑕而可戮實握兵之能政

奚執簡之舉違如或冥命於連營畏予不敢今則分部  
 而賜戟無我有違宜崇魏絳之威勿議秦彭之罪

得甲告老請立長為嗣長辭云不能請讓其弟

或詰之云弟好仁

讓賢雖仁廢長非順徒聞建善則理其如亂嗣不祥甲  
 告老於朝立子為後雖急難自舉必有可觀者焉而長  
 幼以倫無所苟而已矣况欲正其爵位豈宜越以鴈行  
 于弟克恭厥兄徒見好仁之請知子莫若於父盍從立  
 長之言無忌雖欲傳家季扎終當棄室諒可致詰罔聽  
 不能



得甲出妻妻訴云無失婦道乙云父母不悅則出何必有過

孝養父母有命必從禮事舅姑不悅則出乙親存為子  
年壯有妻兆啟和鳴授室之儀雖備德非柔淑宜家之  
道則乖若無爽於聽從曷見尤於譴怒信傷婉婉武維切  
理合此離且聞莫慰母心則宜去矣何必有虧婦道然  
後棄之未息游詞請稽往事姜詩出婦益為小瑕鮑永  
去妻亦非太過明徵斯在薄訴何為

得景有姊之喪合除而不除或非之稱吾寡兄弟不忍除也

喪雖寧戚禮宜節哀緦不足與有餘必跂及而俯就景  
愛深血屬禮過時制與鮮兄之歎情既鍾於孔懷及居  
姊之喪服將除而不忍雖志崇敦睦而事越典彝况儀  
貴適中哀不在外宜抑情而順變多笑以為苟在禮而  
或踰過猶不及請遵仲尼之訓無執季路之辭

得丁陷賊庭守道不仕賊帥逼之辭云堯舜在上下有巢許遂免所司欲旌其節大理執不許

臣節貴忠國經懋賞宜遵善道難廢彝章丁陷在賊庭  
強其祿仕敦在三之義因時難而名聞守無二之忠經



歲寒而節見逼夷齊以周粟引巢許於唐臣身以道存情非利動所當厚獎何乃深疑且人無不臣之心所謂順也邦有惟重之典其可廢乎從亂則必論辜守道豈無旌善野哉大理信乃執迷展矣所司誠為勸沮

得景為大夫有喪丁為士而特弔或責之不伏官有常尊禮無不敬位若殊於等列弔則異其節文景為大夫丁乃元士居喪而哭合遵朝夕之期特弔以行奚越尊卑之序既乖前典乃速斯言且禮貴明徵位宜慎守俟非其事信于食菜之榮儀失其宜徒展贈芻之意是曰無上將何以觀

得吏部選人入試請繼燭以盡精思有司許之及考其書判善惡與不繼燭同有司欲不許未知可否

旁求俊造迨將筮仕歷試文辭俾從上夜苟狂簡而無取宜確執而勿聽萃彼群才登于會府惟賢是急慮失寶於握珠有命則從許借光於秉燭及乎考覈罕有善英屬辭既謝於揀金待問徒煩於繼火將期百鍊之後思苦彌精何意一場之中心勞逾拙曷堪早已焉用晚成敢告有司勿從所請

得乙貴達有故人至坐於堂下進以僕妾之食



或謂之乙曰恐以小利而忘大名故辱而激之也

貴賤苟合曾是汎文窮達相致乃為執友乙既登責任爰有故人以為念舊追歡知己之心未至行權勵節成人之美則多不登夫子之堂乃進僕人之食苟推誠而相激雖屈辱以何傷安實敗名重耳竟慙於子犯感而成事張儀終謝於蘇君是勉後圖且符往行如或識纒半面莽未同心雖發憤以達人必取怨於謗已以斯致謂亦謂合宜

得景領縣府無蓄厚無儲管郡詰其慢職景云

王者富人藏於下故也

賦歛異宜君臣殊政藏諸百姓在王者而則然虛我千倉於職司而不可景賈茲國用豐彼家財人不誅求誠為寬政府無儲蓄學匪慢官况今征稅有常公私兼濟苟能取之以道則下自樂輸何必藏之於人使上將乏用既爽奉公之節宜甘掠美之科罔縱縣辭請依郡詰得丁食於喪者之側而飽或責之辭云主人食

我以禮故飽

飲食以陳庶無求飽齊衰可恤仁豈忘情丁靡念人喪故求主禮遇加遽之膳誠可療饑對泣血之哀亦宜忘



味既念吉蠲之饌是忘惻隱之心况春於其鄰相猶違禮而食於其側飽亦非仁徒嘉施氏之儀且味宜尼之教勿思變色當顧威容

得甲為獄吏囚走限內他人獲之甲請免罪

園土不嚴罪人其遁亡而由已誠曰慢官獲則囚人其何補過相維彼甲所謂攸司不念恪居傲于妾里旋聞失守逸乃楚囚雖非故縱所為曾是慢常而致徒稱勿佚未可塞違得於他人自是疎網無漏失其所職豈可出匣不科無貪假手之功固合甘心於罰

得乙川游所由禁之云有故要渡

示眾知防必修水禁救入鮮死無縱川游乙行險不患憑河無悔慕呂梁之術習於浮水違周官之令忌彼危身將不弔而是虞雖有故而宜禁忘子產喻政爾則狎而翫之引仲尼格言吾恐蹈而死者既殊利涉當戒善游未可加刑且宜知懼

得景為將每軍休止不繕營部監軍使効其無

備辭云有警軍陣必成何必勞苦

將苟有謀勞而後逸師不用律臧亦為凶况未靖方隅尚勤征伐即戎推轂既崇四七之名臨敵屯營何乖什伍之列是使人慢孰謂戎昭薄威雖欲恤勞徹警恐為



白集 卷之二十一  
懈怠且有嚴有真猶奪先人之心不備不虞寧救長蛇  
之尾必也權能制勝謀必出奇亦待臨事有成然後斯  
言可信監軍之効舉未失中彼景之辭試可乃已

得丁乘車有醉吐車茵者丁不科而吏請罪之

丁不許

克寬克仁所謂易事不知不愠是曰難能况乎醉起甕  
間嘔盈車上小人沉湎自貽誚於彼昏君子含弘乃忘  
情於斯怒宥過所宜無大知非度使有慙未乖觀過之  
仁雅叶諱思之義且恕當及物察貴用情絕纓纒淫醉  
而猶捨吐茵及亂誤豈不容無從下吏之規庚叶前賢

之美

得甲牛舐乙馬死請償馬價甲云在放牧處相

舐請陪半價乙不伏

馬牛于牧蹄角難防苟死傷之可徵在故誤而宜別况  
日中出入郊外寢訛既品量以齊驅或風逸之相及爾  
牛孔阜奮駢角而莫當我馬用傷踣駿足而致斃情非  
故縱理合誤論在卓棧以來思罰宜惟重就桃林而招  
損償則從輕將息訟端請徵律典當陪半價勿聽過求  
得景娶妻二年無子舅姑將出之訴云歸無所

從



承家不嗣禮許此離去室無歸義難棄昔景將崇繼代  
是用娶妻百兩有行既啟飛鳳之兆三年無子遂操別  
鵠之音將去舅姑終鮮親族雖配無生育誠合比於斷  
絃而歸靡適從庶可同於束蘊固難効於牧子宜自哀  
於鄧攸無抑有辭請從不去

得丁喪親賣宅以奉葬或責其無廟云貧無以  
為禮

慎終之道必信必誠死葬之儀有豐有省諒欲厚於卜  
宅亦難輕於慮居丁昊天降凶遠日叶吉思葬具之豐  
備欲祔九原顧家徒之屢空將鬻五畝愛雖深於送死

義且涉於傷生念顏氏之貧豈宜厚葬覽子游之問固  
合稱家禮所貴於從宜孝不在於益侈盡伸破產之禁  
以避無廟之嫌

得甲之周親執工伎之業吏曹以甲不合仕甲  
云今見脩改吏曹又云雖改仍限三年後聽  
任未知合否

業有四人職無二事如或居肆則不及在甲爰有周親  
是稱工者方耻役以事上且思祿在其中有慕九流雖  
欲自遷其業未經三載安可同升諸公難違甲令之文  
宜守吏曹之限如或材高拔俗行茂出群豈唯限以常



科自可登乎大用以斯而議誰曰不然

得乙請用父蔭所司以贈官降正官蔭一等乙

云父死王事合與正官同

官分正贈蔭別品階如酬死繼之勲則厚賞延之寵追思乙父勵乃臣節捐軀致命尚克底定爾功繼代勲能豈忘勤卹我後椒柳既稱有實桃李未可無陰忠且志身優宜及嗣如或病捐館舍贈官當合降階今則死衛國家叙蔭所宜同正庶旌義烈用叶條章

得景為錄事參軍刺史有違法事景封狀奏聞

或責其失事長之道景云不敢不忠於國

守位居常小宜事大持法舉正卑可糾尊景名署外臺身由中立直而自守郡郵之政必行明不相蒙州將之邪無隱且六條在撓百事滋昏苟不提綱是為漏網雖舉違犯上虧敬長之小心而陳奏盡忠得事君之大節既非下訕難抑上聞

得丁私發制書法司斷依漏洩坐丁訴云非密

事請當本罪

君命是專刑其無小王言非密罪則從輕丁乃攸司屬當行下不慎厥德擅發如綸之言自災于身難求疎網之漏然則法通加減罪有重輕必也志在私行唯當專



達之責如或事關樞密則科漏洩之辜請驗跡於紫泥  
方定刑於丹筆

得甲為所由稽緩制書法直斷合徒一年詎云  
違未經十日

王命急宣行無停晷切古委制書稽緩罪有常刑將欲正  
其科繩必先揆以時日甲懈位敗度慢令速尤蓄怠棄  
之心既虧臣節蹇駁奔之命自犯國章然則審時勾稽  
考程定罪法直以役當期月所由以違未浹辰將計年  
以斷徒恐乖閱實請據日而加等庶叶公平是曰由文  
俾平息訟

得乙盜買印用法直斷以偽造論詎云所由盜  
賣因買用之請減等

賄以公行印惟盜用罪之大者法可逃乎伊人無良同  
惡相濟所由既敗官為墨予取予求彼乙乃竊器成姦  
不畏不入潛謀斯露竊弄難容猶執薄言將求末減用  
因於買比自作而雖殊情本於奸與偽造而何異以茲  
降等誠恐利淫

得有聖水出飲者日千數或謂偽言不能愈疾  
且恐爭鬪請禁塞之百姓云病者所資請從  
人欲



執禁之要在乎去邪為政之先必也無訟也彼泉水流于道周飲瓢之人孔多茂聞病間濫觴之源不足必起爭端訟所由生欲不可縱上善未能利物左道足以惑人且稽以祥符徵之時事地不藏寶當今自出醴泉天之愛人從古未聞聖水無聽虛誕之說請塞訛偽之源得景有志行隱而不仕為郡守所辟稱是巫家不當選吏功曹按其詭詐景不伏

鳴鶴處陰聲聞于外玄豹隱霧樂在其中此將適於退藏彼何強之維繫景業敦道行志薄宦情太守以舉爾所知將申蒲帛之聘夫子以從吾所好不顧弓旌之招

懼俗吏之徒勞引巫家以自穢異其言遂獲免翻以行詐論辜况商洛拂衣漢且求之不得穎川洗耳堯亦存而勿論天子尚不違情功曹如何按罪

得丁為刺史見冬涉者哀之下車以濟之觀察使責其不順時修橋以徼小惠丁云恤下

津梁不修何以為政車服有命安可假人丁職是崇班體非威重輕漢臣之寵失位於高車衛鄭相之名濟人於大水志雖郵下道昧叶中與其熊軾涉川小惠未遍曷若虹橋通路大道甚夷啓塞既闕於日修揭厲徒哀其冬涉事關失政情近沽名宜科十月不成度辨二天



無政

得甲告其子行盜或謂其父子不相隱甲云大

義滅親

法許原親慈通隱惡俾恩流于下亦直在其中甲忝齒人倫忍傷天性義方失教曾莫愧於父頑攘竊成姦尚不為其子隱道既虧於庭訓禮遂闕於家肥且情比樂羊可謂不慈傷教况罪非石厚徒云大義滅親是不及情所宜致誚

得州府貢士或市井之子孫為省司所詰申稱群萃之秀出者不合限以常科

惟賢是求何賤之有况士之秀者而人其捨諸惟彼郡貢或稱市籍非我族類則嫌雜以蕭蘭舉爾所知安得棄其翹楚誠其惡於稗敗諒難捨其茂異揀金於砂礫豈為類賤而不收度木於澗松寧以地卑而見棄但恐所舉失德不可以賤廢人况乎識度冠時出自牛醫之後心計成務擢於賈豎之中在往事而足徵何常科而是限州申有據省詰非宜

得乙充選人職官選人代試法司斷乙與代試者同罪訴云實不知情

官擇賢良選稽名實苟作偽而心拙必代斷而手傷乙



情非容姦行乖周慎將如吾面遂充識以不疑未見子  
心果代試而有悔既彰聞而貶戚乃連坐以論辜察情  
諒不同謀詰罪誠應異罰法無攸赦選者當准格論人  
不易知職官所宜情恕削奪恐為過當貶降度叶決平  
得甲與乙爵位同甲以齒長請居乙上乙以皇

宗不伏在甲下有司不能斷

庠序辨儀則先長長朝廷列位必尚親親惟彼周行是  
各同位德非心競禮失肩隨甲以桑榆年高何以卑我  
乙以葛藟族貴奚獨後予各與爭長之辭遂昧常尊之  
位然禮經尚齒且王室貴親晉鄭同儕信高卑之或等

滕薛異姓諒先後之可知難遵少長之倫宜守親疎之  
序

得選舉司取有名之士或云不息馳驚恐難

責實

聲雖非實善豈無名不可苟求亦難盡棄屬時當側席  
任重掄材思得士於聲華懼誘人於奔競若馳驚而方  
取慮非歲貢之賢如寂寥而後求恐失日彰之善將期  
據實必在研精但取捨不私是開乎公道則吹噓無益  
自閉其倖門名勿論於有無鑒自精於舉措

得太學博士教胃子毀方尾合司業以非訓導



之本不許

教惟馴致道在曲成將遜志以樂群在毀方而和衆况  
化人由學成性因師雖和光以同塵德終不雜苟圓鑿  
以方枘物豈相容道且尚於無隅義莫先於不翮呼對切  
司業以訓導貴別或慮雷同學官以容衆由寬何傷在  
合教之未隊蓋宣尼之言然文且有徵則戴氏之典在  
將勸學者所宜躉之

得甲居家被妻歐笞之鄰人告其違法縣斷徒  
三年妻訴云非夫告不伏

禮貴妻柔則宜禁暴罪非夫告未可麗刑何彼無良於

斯有怒三從罔敬待以庸奴之心一杖所加辱於女子  
之手作威信傷於婦道不告未爽為夫和招訟於鄰誠  
愧聲聞于外斷徒不伏未乖直在其中雖昧家肥難從  
縣見

得乙居家理廉使舉請授官吏部以無出身不  
許使執云行成於內可移於官

調選正名誠宜守序敷求懋德安可拘文乙積行於中  
闇彰于外廉使以道敦知已欲致我於青雲天官以限  
在出身將棄予於白屋事雖異見理可明徵掄瑣瑣之  
材則循舊格刈翹翹之楚寧守常科幸當側席之求無



惑刻舟之執况自家刑國移孝入忠既聞道不虛行足見舉非失德所宜堅決無至深疑

得景定婚訖未成而女家改嫁不還財景訴之

女家云無故三年不成

義敦好合禮重親迎苟定婚而不成雖改嫁而無罪景謀將著代禮及問名二姓有行已上和鳴之兆三年無敵竟行嫵婉之期桃李恐失於當年榛栗遂移於他族既聞改適乃訴納徵揆情而嘉禮自虧在法而聘財不返女兮不棄未乖九十之儀夫也無良可謂二三其德去禮逾遠責人斯難

得丁為大夫與管庫士為友或非之云非交利也

見賢不稱且虧事上之節非義苟合則涉黷下之嫌丁貴乃立家友其管庫不思進善徒務降尊若接而或非自貶交利之責儻知而不舉則速蔽賢之尤既未覈於是非故欲紊乎貴賤况公叔薦士家臣尚見同升雖文子好能管庫不聞為友信乖慎守宜及或非

得四軍帥令禁兵於禁街中種田御史劾以無

勅文辭云因循歲久且有利於軍

為國勸農田疇有制示人知禁衢路攸先瞻彼三農藝



斯五稼且町他頂切曠土阜切是務豈是曠軍雖轍  
迹不加未為曠王輦轂必資於平易康莊難縱以荒蕪  
務有畔之農秋成而利亦益寡侵如砥之道歲久而弊  
則滋多請論環衛之非式表鐵冠之劾

得甲為郡守部下漁色御史將責之辭云未授

官已前納米

諸侯不下用戒淫風君子好求未乖婚義甲既榮為郡  
且念宜家禮未及於結褵責已加於執憲求娶於本部  
之內雖處嫌疑定婚於授官之前未為縱欲况禮先納  
采足明嫵婉之求聘則為妻殊非強暴之政宜聽隼旟

之訴難科漁色之辜

得乙為三品見本州刺史不拜或非之稱品同  
桑梓攸重必在恪恭官品斯同則宜抗禮乙班榮是踐  
威重可觀况衣錦還鄉已崇三品之秩雖剖符臨郡應  
無再拜之儀豈以州里版圖而紊邦家典制如或商周  
不敵敢不盡禮事君今且晉鄭同濟安得降階里我既  
不愆素何恤或非

得景為獸人冬不獻狼責之訴云秦地無狼

鮮或不給既曠乃官辭且無徵是重而罪景獸人斯掌  
禽獸罔供當路可求曾不思於毫尾无庖為用遂有闕



於充腸既愆冬獻之期難償西鄰之責載鮮地產重振國童薦必以時吾能言於周有生靡常所子勿謂其秦無縱口給之不慙在面欺而無捨

得景負丁財物丁不告官強取財物過本數縣司以數外賊論之不伏

人縱於貪動而生悔物非其道取則有憾丁放利欲贏景逋債未償懷不忌而強取姑務豐財逞無厭之過求豈非竄貨情難容於強暴法必禁以奪攘以交易而求多尚宜准盜在倍稱而過數孰謂非賊若以律論當從縣斷

得乙請襲爵所司以乙除喪十年而後申請引

格不許乙云有故不伏

爵命未墜嗣襲有期在紀律而或愆當職司而宜舉乙舊德將繼新命未加所宜纂彼前修相承以乙子何乃廢其後嗣自棄於十年歲月既已滋深公侯固難必復然以法通議事理貴察情如致身於宴安則宜奪爵若居家而有故尚可策名須待畢辭方期析理

得丁為士葬其父用大夫禮或責其僭辭云從

死者

禮惟辨貴孝不貶親是謂奉先孰云僭上下慶加一命



憂及三年凶降昊天且結茹荼之痛吉從遠日方追食  
菜之榮既貴賤之殊宜亦父子之異道同曾元易簣止  
符於大夫殊晏嬰遺車見非於君子未爽慎終之義允  
符從死之文辭則有徵責之非當

得甲將死命其子以嬖妾為殉其子嫁之或非

其違父之命子云不敢陷父於惡

觀行慰心則稟父命辨惑執禮宜全子道甲立身失正  
沒齒歸亂命子以邪生不戒之在色愛妾為殉死而有  
害於人違則棄言順為陷惡三年之道雖奉先而無改  
一言以失難致親於不義誠宜嫁是豈可順非况孝在

慎終有同魏顆理命事殊改正未傷莊子難能宜忘在  
耳之言庶見因心之孝

白氏長慶集卷第六十七終



此以言類因心入卷  
 其後首同類類與命專於也今未見其子論其自心也



